











DISSERTATIO MEDICA

INAUGURALIS,

DE

P O D A G R A.





DISSERTATIO MEDICA  
INAUGURALIS,

DE

P O D A G R A.

QUAM

ANNUENTE SUMMO NUMINE,

Ex Auctoritate Reverendi admodum Viri,

D. GULIELMI ROBERTSON, S.S. T.P.

ACADEMIÆ EDINBURGENÆ Praefecti;

NEC NON

Amplissimi SENATUS ACADEMICI consensu,

Et nobilissimæ FACULTATIS MEDICÆ decreto;

PRO GRADU DOCTORIS,

SUMMISQUE IN MEDICINA HONORIBUS AC PRIVILEGIIS

RITE ET LEGITIME CONSEQUENDIS;

Eruditorum examini subjicit

C A R O L U S S C O T,

A N G L U S,

——— “*Nodosa Podagra.*” OVID.

“*Caedimus inque vicem praebeamus crura sagittis*

“*Vivitur hoc pacto.*” PERS.

Ad diem 24. Junii, hora locoque solitis.

E D I N B U R G I:

Apud BALFOUR et SMELLIE,

Academiae Typographos.

---

M,DCC,XC.





H E N R I C O,  
DUCI DE BUCCLEUGH,

&c. &c. &c.

Majoribus cum genere,  
Tum virtute, nobilissimis  
Dignissimo;  
Utpote cui  
Incoctum generoso pectus honesto  
Est;  
Itaque adeo  
Carus amicis, carus patriae,  
Vivit,  
Vivetque extento aevo,  
Notus famae  
Haud strenuae inertiae,  
Quae  
Cassa est sterilisque,  
Sed actuosae virtutis,  
Quae  
Humani nihil a se alienum putat;  
Hocce Opusculum,  
Ejus monumentum et pignus observantiae,  
Quae  
Tali viro, eidemque principi  
Familiae suae,  
Debetur,  
Sacrum voluit  
CAROLUS SCOT.



# DISSERTATIO MEDICA

INAUGURALIS,

DE

P O D A G R A.

---

**P**ODAGRA quidem ex quo velut morbus sui generis notatus fuit, medicis jure animadversionem summam et diligentiam excitavit. Ab Hippocrate usque ad nostrum tempus multiplici ingenio atque eruditione contra hoc malum miserius certatum est. Commentationes bene multae eo consilio prolatae fuerunt, ut natura ejus intelligi, nec non rationalis medicina instrui posset.

A

Celebris

Celebris ille W. Temple, quippe et ipse mature tentatus, ultro sagacitate sua pugnare volebat. Novit certe, homines nitidos lautioresque maxime omnium periclitari, unde animus debilitatur, perlevibusque momentis obnoxius redditur. Quibusdam experimentis, in sese scilicet, motus, *moxam*, quasi omnium instar, venditavit; inconsulte autem ac temere; namque usus, efficacissimus rerum omnium magister, peculiariter utique medicinae, hocce opinionis commentum delevit. Caeterum error viri illius, utpote in curando hospitis, paulum oppido nociturus erat.

Reputantibus enimvero, quantum sagax ipse D. Sydenham conflictabatur, merito perquam fanatio propria et certa difficillima esse videatur. Hinc in praesentia ad studium quorundam duntaxat, quae Podagrae semper fere adsunt, denuo revocare et laceffere maluerim.

## DEFINITIO,

Quae omnium praecipuae arridet, quippe quod nihil absolutius adhuc exstiterit, haec est :

“ Morbus haereditarius, oriens sine causa externa evidente, sed praeeunte plerumque ventriculi affectione insolita ; pyrexia ; dolor ad articulum, et plerumque pedis pollici, certe pedum et manuum juncturis, potissimum infestus ; per intervalla revertens, et saepe cum ventriculi, vel aliarum internarum partium affectionibus, alternans \*.”

## HISTORIA.

Morbus autem hicce commode satis in duo genera dividitur, alterum nempe ordinatum, alterum inordinatum.

Prius

\* D. Cullen Nofol. Method. G. xxiṽ.

## DE PODAGRA.

Prius vere ineunte saepius accedit, eoque citius tardiusque, quo hoc acrem hyemem serius ociusve solvit. Quam leviter obrepat, atque inopinato occupat; multa quidem debilitatis indicia adsunt; sed tamen haud ea, quae tale quid instari corpori nihil id genus antea passio praenuntiarent.

Crudititas, inflatio, ventriculi gravitas, eaque aliquot fere hebdomadis usque augescunt; nec non torpor inflatioque musculorum foeminum, ac motus spastici saepe accessionem in proximo esse significant.

Hora circiter secunda tertiave matutina, homine tum cubante, incipit accessio ipsa ab acuto dolore in globulo aut prima junctura pedis pollicis, aliquando in calce, vel talo vel fura. Nunc quoque horror sentitur, qui, prout dolor augebit, minuitur, eundemque ex toto finitum febricula excipit, quae quidem ipsa, dolore manente, manet.

Dolor ab accessionis initio, mediocris est; augescens vero in horas proximam circiter vespeream, ligamentis jam ossium tarfi metatarsique  
plerumque

plerumque affectis, quam vehementissimus urget. Hic profecto satis idonee comparatus cruciatui maximo, quantus a cane partem corrodente, aut membranis durissima constrictione correptis cieretur, et angorem animi, et corporis jactationem faceffit.

Remissio autem fit proxima fere nocte, quatuorque viginti horis post primam accessionem dolor, parvo nimirum sudore erumpente, inter quem homo soporatur, penitus definit. Ex somno partes dolore vacant, rubent tamen tumentque; aliquot vero post diebus pristinum colorem recipiunt.

Verum dolor et febricula, quamvis in speciem accessione finita, solent intra duos tresve dies nonnunquam repetere; amboque, in vesperam aliquanto auctiora, usque ad ipsum mane magis minusve affligunt.

Morbus denique, hoc modo paucos per dies versatus, interdum omnino decedit, nec nisi longo post intervallo regreditur.

Atqui



Atqui hoc mali genus, ordinatum nempe, aliquando acerbius faevit. Saepe etenim pedes alterne cruciantur; quin etiam prius affectus interdum post alterum liberatum rursus corripitur. Raro, sed aliquando tamen, evenit, ut ambo pariter doleant. In medicorum vero monumentis notatum est, accessiones, quae sequantur, ambobus scilicet pedibus una jam dolore defunctis, alias aliter incipere ac manere; dolorem vero sub vespera itidem usque augeri minuique. Caeterum homo aliquamdiu talia, dura quidem atque asperrima, perpeffus, fere aliquanto post validior corpore atque animo evadit.

Rarius quidem secundo, nisi ex intervallo duorum triumve annorum, repetit \*; posteaque tamen semel quotannis, deinde bis, tum denique frequentius hyeme, vere, atque autumnino invadit. Atque adeo iterum ac saepius intra annum accedens, vix unquam postremo, nisi aestate, abest.

Ambos

\* Aliquot profecto reperiuntur qui vel ex prima accessione, semel singulis deinceps annis, iisque compluribus infestati sunt.



Ambos pedes una aliquando torqueri, supra positum est; hoc vero nunquam fit, nisi crebras post accessiones, seu corporibus suae propriae irritabilitatis; etenim, quo frequentius malum tentaverit, eo magis et partes quondam vexatas, et alias insuper sibi obnoxias reddere videatur.

Omnes singuli articuli partium et supra et infra extremarum, suum quisque ad tempus, modo alius post alium, modo complures simul, dolorem patiuntur. Caeterum hic idem, id quod insidentem pene assiduam molestiae gravitatem quodammodo levet, quo saepius accessio facta est, eo magis decrescit. At enim aegrotatio aliaque generis inordinati indicia subeunt.

Articuli quidem aliquoties duntaxat ita exerciti, vim suam motumque recipere solent; crebrius tamen, non itidem; quippe infirmantur, atque ad postremum durescunt. Nunc demum materies cretacea in iis proxime subter cutem accrescit. Materies certe haec primo fluida subfidit; ex terra friabili constat, omnino per acida dissolubilis, ac simul cum aliis suam cuique articulo mobilitatem adimunt.

Podagra

Podagra denique corpus, complures per annos, injuriis suis exagitatum, aliis morbis opportunius praestare videtur. Fere enim plerique, verbi causa, qui diutius ea conflictati fuerint, queruntur molestias, quarum signa omnino referunt illa, quae e renum calculis nascantur. Caeterum in confesso est, duo istos affectus una nunquam adesse.

Ac de Podagra ordinata, quae quidem non injuste terreat, haecenus dictum est; veniamus nunc ad inordinatam, lubricum sane, et fortasse periculosiorem locum.

Hoc autem genus vulgo in tres species, *atonicam*, nempe, *retrogradam*, *vagamque*, dividitur.

Earum vero prima articulos nullo dolore neque inflammatione afficit, sed occupans ventriculum, corpore nimirum ipso ad tale vitium proclivius, ubi cupiditatem tollit, cruditatem, inflationes, nauseam, acidos ructus, aliaque id genus efficit.

Dolores spasmiique etiam variis in partibus, superioribus praesertim extremis, sentiuntur, quibus

quibus omnibus spiritus ex stomacho evocatus fere auxiliatur.

Alvus adstrietior fusiorve cum torminibus, hypochondriasis, delirium seu mania, cuncta denique, ut postea videbitur, *nervosa* quae audiunt, inter hanc morbi speciem obversantur.

Altera species, retrograda scilicet, inflammatione articulorum satis denotatur. Qua quidem etiamsi ordinatam simulet, nihilominus tamen eo maxime differt, quod dolor atque inflammatio sunt minora, eorundemque spatium est brevius, nec non exitus citior; desinunt quippe subito atque omnino; affectusque videtur transferri ad interiorem quandam partem, ventriculum saepius, ubi dolorem summum, nauseam, vomitum, gravitatemque excitat.

Interdum cor ita laeditur, unde defectio animae, interdum pulmones, unde asthma insequitur.

Paralysis atque apoplexia quoque tali ex causa aliquando fiunt.

B

Caeterum

Caeterum de notarum, quantumvis licet diversarum, origine, quae hac in specie exhibentur, nihil fere est, cur dubitandum sit. Satis enimvero constat, omnia ex articulo ita male habito exoriri.

Tertia denique species vocatur vaga aut aberrans \*. Quo sub nomine omnes inflammationes, quae interiorum quidlibet, articulis praetermissis, occupent, comprehenduntur. Harum autem signa sunt eadem illis, quae alia quavis causa nascantur, ideoque ex sola proclivitatibus congruentia ei tribuenda veniunt.

Nunc vero, narratione hacce explicita, roget quis, quid podagrae cum signis totidem variis, et diversis, atque in omnem partem diffusis? Fortasse, opella procedente, res accendent lumina rebus.

#### PRÆDIS.

\* Bene multis quidem hocce vocabulum displicet, quippe quia experientia vim ejus, seu rem ipsam, adhuc non fatis comprobavit.

## PRÆDISPONENTIA.

Haec liceat mihi dispertire in duplicem proclivitatem, haereditariam nempe, et acquisitam. Distributio forsitan nova est, veruntamen, ut mihi equidem videtur, haud absurda.

## PROCLIVITAS HÆREDITARIA.

Utrum Podagra quoque per successiones quaedam, ut alia, tradatur, necne? quaestio est, quae per multa volumina, perque magnae contentionis disputationes, a medicis saepe tractata sit atque tractetur; siquidem in omnibus ejusmodi cogitationibus in utramque partem differi potest. At vero ipsa exemplorum evidentia, nec non analogia demum vicisse videntur, ut morbus hicce haereditarius haberetur. Caeterum, singulis argumentis, quae ad hanc rem probandam



probandam allata fuerunt, in praesentia omiſſis, ſatis erit obiter notare ſimilitudinem modo, tum animi, tum corporis, quae inter gignentes ac genitos exiſtit.

Monſtra quidem eduntur, et muli; haec autem exempla non modo non contra rem, ſed pro re potius eſſe videantur.

Verumenimvero aliqua ſunt, quae naturam ipſam moderantur atque deſlectunt quodammo-  
do. Morbus certe ex hac nota eſt.

Annon illud facile animo concipi queatur, numeroſiſſimis nempe varietatibus morborum conſideratis, quod minutae ac magis neceſſariae animalium partes ita affici poſſunt, uti motus eorum inde aliter aliterque regerentur. Hinc quicumque morbus ipſo ex corpore, tanquam ſeminio ſibi proprio, oritur, idem aliquatenus tradatur genitis neceſſe eſt. Nihil aliud igitur, huic loco neceſſarium, reſtat, niſi illud (ſicut poſtea conabimur) oſtendere, quod podagra tam penitus corpori inhaereſcit, et tanquam in venis, medullis, viſceribusque inſidet, ut omnino omnium actionum ſocia adſit.

Caeterum

Caeterum in praesentia, analogiae causa, allegasse sufficiet, duo ista mala, strumam scilicet ac maniam, quae multa post secula hodieque pristina vi sua, quippe gentilitia, grassantur faeviuntque.

### PROCLIVITAS ACQUISITA.

Perspicuum est, constatque inter omnes, utcunque de rationibus dissentientes, compluria esse, quae motum vitalem servant minuantve.

Nemo est hominum, qui, suo ab oculo, firmitatem valetudinis, quae ut urbano, desidiae luxuriaeque pleno, ab ea, quae rustico temperanti atque exercitato contingit, dignoscere nequeat.

Contra alterius pallidae faciei gracilique forma respondent genae alterius rubentes corpusque musculis robustissimum. Hujus autem diversitatis nemo causam nescit dubitatve affirmare,

re, quod inde soboli utriusque necessario even-  
turum erit. Adeo “ fortes creantur fortibus ;  
“ neque imbellem feroces progenerant aquilae  
“ columbam.”

Infans certe, qui mollior atque imbecilliori-  
bus nervis in lucem editur, vix vitalis erit,  
quippe qui, ut ita dicam, cuicunque vel levissi-  
mo vento debet ludibrium.

Quae cum ita sint, minime mirum est, si om-  
nes actiones tali ab corpore quodammodo affi-  
cerentur, fibraeque musculorum, aetate proce-  
dente, vitiatae podagra evaderent.

Quin contra, si nulla omnino primigenia la-  
bes, neque proclivitas adfit, attamen quis nescit,  
complures morbos, veluti Dyspepsiam, Hypo-  
chondriasin, Icterus, quibus quidem Podagra  
suo jure accedere meretur, ab socordia ipsa at-  
que ignavia, quippe compagem humanam sol-  
ventibus, arcessi attrahique.

Caeterum nullus, his quanquam dictis, ac-  
cesserim ingenioso illi, qui proclivitatem acqui-  
sitam ostentavit, quasi unicam, ex qua ratio  
cunctorum



cunctorum morbi indiciorum facile intelligi possit \*. Enimvero interdum vel potius nimium saepe est, ubi summa in cibis potionibusque temperantia, nec non quam curiosissima exercitationis ratio hominem ab haereditariae proclivitatis malignitate vindicare nequeunt.

## EXCITANTIA.

Hujus autem generis sunt omnia singula, quae vires infringunt ac debilitant. Minime igitur mirum videri debet, si cautio ac diligentia, quanta ea cunque demum sint, vix aut ne vix quidem corpus, huic malo proclivius, tutum ab omni injuria praestare possint.

Quicumque luxuriosus epulantur, nimium utique carnis vinique ingentium virium devorantes, fere admodum periclitari videntur.

Caeterum,

\* D. Cadogan.

Cæterum, quaecunque totum corpus vehementius commovent, eadem citius accessionem afferunt.

Omniū vero hujus notae immodica Venus forsitan in primis memoranda venit.

Bacchus quoque nimius impetum huic malo saepius dedit.

Porro autem incuria tum materiae, tum numeri eorum, quae ingeruntur; multa negotiosa cogitatio vel actio; nocturna vigilia; pleraeque exinanitiones immoderatae; operae vel exercitationis solitae subita, utique in longius, mutatio; transitus ad alterum cibum, a pleniore praecipue ad permodicum; acida, seu liquores aciduli temere assumpti; frigus denique, ad extrema inferiora admissum, frequentissime huic vitio occasionem aperiunt.

Postremo, nihil hujusmodi est potentius, quam magnae animi perturbationes, in quas quidem, id quod, ut aiunt, oleum addit camino, homo nunquam alias tam facile incidere solet. Atque adeo D. Sydenham scite perquam dixit, “ non  
“ enim

“ enim rectius Podagrae, quam Iracundiae, pa-  
“ roxyismus omnis dici potest ; cum \*,” &c.

Per haec haecenus prolusum est ; agatur nunc  
oportet de

## PROXIMA CAUSA.

Istam certe aestimare, hic labor, hoc opus  
est ; quod quidem opus permulti ausi sudarunt  
multum, frustraue laborarunt.

Prius vero indicandum est, idque cursim et  
breviter, quae maxime hac de re dicta fuerunt.

Medici olim humores, quippe ex morbo ali-  
ter aliterque mutatos, primariis affectibus patere  
existimabant. Hinc ratio complurium morbo-  
rum, sanguine scilicet nunc in acidum, nunc in  
alkalinum, pro eo, ut auctori placuerit, varian-  
te, fatis facile redditur.

C

Sanguis

• D. Sydenham Tract. de Podagra.

Sanguis nimirum in Scorbuto ac Typho putrescit; in Rheumatismo, Pneumonia, et Phrenitide lentescit atque inflammatur; in Struma humores sunt corrosivi, in Hypochondriasi contra nimis blandi; in Podagra denique propriae acrimoniae plurimum habere putantur.

At vero nihil omnino acrimoniae istius, podagrica chiragricave quae audit, usque adhuc, humoribus quomocunque mutatis, in hominibus, seu proclivioribus, sive etiam aegris, prehensum fuit.

Materies quidem cretacea, quae aliquando in articulis accrescat, lenis omnino est, videturque nil aut paululum ab terra calcarea distare.

Ex urina deinde nihil, nisi quod soleat post corpus, qualecunque modo gravius affectum, defidit.

Plurima denique sunt, quae huic opinioni repugnant.

Post accessionem, verbi causa, noxia materies digeri putatur; nihilo tamen secius, si tum al-

vus forte purgatione sollicitaretur, ne iste dolor omnis continuo redit. Enimvero, si vitium in humidis versetur, exinanitiones satis commode facerent; ast eas huic morbo quam alienissimas esse constat.

Porro autem, quod ad podagram inordinatam pertinet, talis opinio pariter quasi claudicat et vacillat.

Certe ex humidorum motu intelligi nequit, cur partes, neutiquam vicinae, subito afficiantur; cur plures ex consortio simul; cur singulae, sua quaeque vice, ipsae praecipuae, dolent.

Denique, proclivitas haereditaria, hacce sententia accepta, nihil omnino valet. Humores etenim prius multo, quam Podagra invadere solet, iterum ac saepius, ab utero olim adeptus, nullus nunc circumagitur; cibus atque absorptio alia humida, aliis nempe per invisibilia ac reliqua foramina continenter exeuntibus, deinceps suffecerunt.

Verum

Verum quidem haec haëtenus ; videmus nunc de altera, eaque prorsus diversa ratione, oportet.

D. Caverhill totas Podagrae causas ex articularum genere elicere conatus est.

Ipse autem putat, arterias, vi nempe musculorum, articulos juxta comprimi et coarctari ; itaque dolorem accessionis ex corde, sanguinem propellere per easdem moliente, progigni.

Quam quidem sententiam, ut illi placet, et partes et corpora, quae saepius laborant, nec non aetas, qua malum fere advenit tueri videntur.

Singula vero morbi indicia hoc modo explicans haud jugiter sibi constat.

Autumat fane ille, nervum uno etiam tempore et sentire et sensu carere posse ; dolorem esse nihil aliud quam penetrabile frigus ; vivum calorem servari ex frictione terrestris materiae, quae in cerebro secreta per nervos impellitur ;  
lapillos.



lapillos denique cretaceos esse tantundem cerebri in articulos depositum.

Singulatim certe unamquemque istarum rerum, quae futiles omnino videntur commentitiaeque, in hoc transcurso tam arctati operis refellere nihil convenit, leviter aliquot attingere fortasse haud alienum est.

Jam vero, si exercitatio in causa est, cur vasa inter se cohaerescant; qui cor unquam ea diducere valebit? Hujus nimirum vis semper musculorum motu intenditur, ideoque nunquam non ejusmodi casum arceret.

Rustici, atque homines, quibus opera vita est, vix unquam ita aegrotant.

Sedentarii praecipue omnium periclitantur: Nonne igitur, D. Caverhill auctore, partes eorundem, quae maxime comprimuntur, in primis tentarentur? Nonne etiam textoribus sutoribusque saepius multo glutaei musculi, quam pedis pollex, doleret?

Idem

Idem porro dixit vasa scilicet remissiora ad cohaerentiam spectare, atque hinc afferre vult rationem, quam ob rem articuli, alius post alium, affici videantur.

Atqui ego crediderim, vasa, ita sese habentia, haud nimio magis ad cohaerentiam spectare; siquidem vis cordis, qui sanguis propellitur, transitus pro difficultate continenter augefcit; unde arteriae nunquam penitus comprimi possint.

Ad summam, reliqua hujus scriptionis sunt ejusdem farinae; itaque satis superque dictum est.

Sed his, sicut aequum est, demissis, quispiam dixerit, “ Quid tandem feret hic censor? Neque enim satis est reprehendisse peccantem, si non doceat recti viam.” Sit ita sane; atque adeo olim fortasse amplius dicendum erit: Sed in praesentia, iis, quae ex conjectura potius, quam usu, chartis illeveram, omissis, me Ciceronis vox non dedecebit: “ Utinam tam facile vera invenire possem, quam falsa convincere.”

RATIO



## RATIO MEDENDI.

Maxime profecto hic me titulus admonet illud poetae, “Frontis nulla fides;” ac vereor equidem ne aliquis nunc idem dixerit, quod Laco olim de Luscinia devorata, “Vox et praeterea nihil.”

Medicus enimvero in Podagra praecipue omnium suas vel excogitatissimas rationes curationesque nil aut admodum paulum proficere expertus plorat. Ab causa ad effectum satis subtili argumentatione conclusum est, sed omnes post syllogismos effectos, quid tunc? Quaeritur usque, Cui bono?

Quod ad me quidem attinet, magis certe optandum, quam sperandum est, uti sequentia quid venia dignum respondeant.

Solum

Solum fortasse periculum, certe maximum, ex podagra timendum est, quando ea, extremis relictis, vitalium quid occuparit; ideoque prudentes medici semper istam transitionem prohibere conati sunt.

Contra autem sunt nonnulli, qui, dum dolorem in extremis lenirent, nihil quidquam pensi habeant, quibus modis id consequerentur. Hinc Empirici, rumusculos imperitorum hominum aucupantes, eoque plus dulcis lucelli, alia atque alia, suum nempe quisque, quasi sola auxilia, venditarunt. Itaque ergo emplastra, quae reprimunt comprimuntque, praefrigida aqua, nec non ambulatio sine calceamentis super nivem glaciemve decantantur.

Talia quidem, utpote quae paucis haud multum nocuerunt, aliquamdiu inculcata sunt. Longior autem experientia atque observatio curiosior compluria mala, non parva, ex podagra ita repulsa subsequi testantur.

D. Hoffmannus, eruditus ille ac sagax, huiusmodi curationem, non modo ut supervacuam, sed etiam periculosissimam, quippe quae interdum

dum affert apoplexiam, paralyfin, defectionem memoriae, afthma, dolorem coli, atque inflammationem viscerum abdominis, reprehendit culpamque.

D. Sydenham nihil aliud, quam cataplasma ex pane et lacte cum croco extrinsecus imponi vult, praecipitque, si dolor urget, ut opium ingeratur.

D. Cheyne, quoque nihil omnino id genus adhibendum esse putat; nisi cum eo, ut ratio simul circuitus per alia fervetur.

Frigus deinde eo consilio imperari videtur, quo parti uni tentatae, vix salva totius corporis ratione, citius succurratur. D. Hoffmannus quidem haud prorsus omnino hoc monitum rejicit; sed, Hippocratis nempe auctoritate motus, eidem aliquatenus parendum esse judicat.

Caeterum, plures auctores nominare nihil opus est, siquidem satis constat, modo credatur D. Musgrave, qui omnia hujus loci tam diligenter exploravit, nulla extrinsecus adhibita praeter

D

ea,

ea, quae malum in extremis usque cohibere valeant, nec utilia, neque etiam innoxia fore.

Atque ideo pedes calida lavari, lanei panni, cataplasmata emollientia, aut quaecunque corpusculis per invisibilia foramina manantibus iter expediant, fortasse praecipue omnium id genus adjuvant.

Moxa, ut jam dictum est, quasi remedium singulare ad partis dolorem tumoremque laudatur. Atque etiam vir ille eximius, ex sui ipsius aliorumque experientia, salubres ejus effectus enarravit. At vero et modus, quo adhibetur, minus placebat, ac res ipsa sua ex facultate, quippe perbrevis, vix videtur par esse tollendo morbo, qui ex totius corporis infirmitate enatus est. Certe enim in hujusmodi casu nullacuratio recte procedere potest, nisi ea ad totum corpus dirigatur; namque velle cursum Podagrae impedire adurendo idem sonat, atque erysipelas curare excidendo partem primo affectam, quod est cum ratione insanire.

Sanguinem, incisa vena, mitti, Celso \* ipso et  
D.

\* Lib. 4. c. 24.

D. Hoffmanno auctoribus, levat inflammationem, dolorem, et febriculam, quae inter accessionem fieri solet. Hoc equidem, discipulus quippe non immemor D. Cullen ingeniosissimi, si quis unquam alius, tam ex morbi ratione supra proposita, quam ob mala compluria infrequentia improbare nullus dubitarim. Caeterum ipse dixit: “I believe, however, that bleeding by leeches on the foot, and upon the inflamed part, may be practised, and repeated with greater safety; and I have known instances of its having been practised with safety to moderate and shorten paroxysms \*.”

Quod ad purgationes attinet, D. Sydenham ita loquitur: “Ego certe persuasissimus sum a jugi et saepe iterata experientia edoctus, catharsin omnem, tam per lenientia, quam per fortiora medicamenta, qualia pro more articulis expurgandis destinantur, plurimum nocere †,” &c.

Huic autem opinioni D. Cheyne repugnat, idque, me iudice, merito; namque, etsi fortiora purgantia

\* D. Cullen, First Lines, &c. DLXIV.

† D. Sydenham de Podagra.

purgantia inter vel post accessionem adhibita aut morbum augeant, aut reditum ei aperiant; attamen lenia certe, quae et bilem suis e vasis elatam dejiciant, atque impedimenta in canali, intestinalis qui vocatur, amoliantur, neutiquam aliena existimari debent.

Inter accessionem vero animus et corpus sunt ambo tam irritabilia, uti summa cautione ad remedia proponenda opus est.

Stomachus quoque, cui toto cum corpore quoddam consortium est, propriam animadversionem desiderat. Ex hujus usu facile apparet, quantum oportebit, refici eum et corroborari. Ad quod consilium aromata, amara, medicamina ex chalybe confecta, cortex Peruvianus, cibisque valentior, saepe commode satis proficiunt. Neque tamen id ignorari oportet, quod talia summam inter accessionem, ubi cutis admodum calescit, febrisque vehemens urget, caute quidem parciusque; sed, cum languor, inflatio, dolorque ventriculi vexant, tum demum liberalius assumenda sunt.

Nunc



Nunc etiam ex opio confecta profunt, atque a D. Sydenham ad somnum movendum praecipuntur. Veri tamen simile est, ea stimulo praecipue valere, quippe quibus hic ipse medicus Podagrae retrocedenti occurrere solebat.

In Podagra utriusque generis modicam exhalationem per cutem continenter fieri multum expedit; sic enim naturales, sano veluti in corpore, actiones quodammodo continuantur. Sudor autem plurimus nocet, utpote qui corpus infirmat, fortasse accessionem protrahit, certe eam citius revocat.

His vero dictis, quae pertinent ad accessionis curationem, ad eam, quae alteram quam procul arceat, transeundum est.

De hac quidem re inter medicos parum constat; namque alii victum tenuissimum refrigerantemque, alii diversissimum proponunt.

Lac autem atque olera multum laudantur.

D. Cheyne etiam contendit, nullam omnino salutem fore podagrico, qui sibimet vivere pane solo ac lacte imperare nolit.

Atque

Atque dubitari non potest, quin cibus optimus victusque luxuriosus summam podagrici cujusque irritabilitatem plus nimio agitet. Corpus enimvero nunc ali curiosius debet, atque ideo leniora omnia chylique efficientia optime conveniunt. Hinc lac plerumque maxime aestimatur, idque jure, si perpetuo, salvaque ratione stomachi, assumi queat.

Denique, D. Sydenham ita effatus est: “ Atque insuper, quod ego palmarium judico, cum lac alimenti genus sit adultis prorsus impar, istam humorum turgescientiam sive virositatem reprimit, cui podagra ortum debet; atque eo nomine paucos istos, quibus congruit, tamdiu a podagra immunes praestat, quamdiu eo solo vescuntur, nec juvat ulterius. Cum enim podagrae causae originali ac primariae, nempe concoctionum ac fermentorum debilitati omnino contrarietur, longe magis hac ratione obest, quam altera prodest \*.”

De oleribus vero multo minus nunc ambigitur; siquidem ea saepius aciditatem, atque inflationem, podagricis infestissima, gignant.

Porro

\* D. Sydenham de Podagra.



Porro autem, “ cum quis mutare aliquid velit, paulatim debebit assuescere. Quodcunque enim contra consuetudinem est, nocet, seu molle, seu durum est.” Quod quidem est praecipue in hujusmodi casu salubre ac frugiferum; namque, quo longius aetas procedit, eo mutatio victus periculosior est.

Caro etiam ipsa, si consuetudini, seu necessitati parendum sit, modo simplex, quantaqueduntaxat facile concoquatur, dari potest.

Quod ad potum attinet, plerisque vinum ex toto circumcidi placet, si nempe usus stomachusque finent \*.

Cerevisia tenuior a D. Sydenham praecipitur; temere forsitan et imprudenter; frigida enim est, inflat, atque acescit.

Aqua, cui paulum admodum vini adusti, (*brandy*), aut liquoris e saccharo (*rum*), aut ex byne cum juniperis confecti (*gin*), sit adjectum, satis commode respondet; fortasse autem ea, cui  
humor,

\* D. Hoffm. de Curat. Dolor. Podagra.

humor, elicited ex byne cum juniperis, misce-  
tur, omnium est optima, quippe quae urinae  
itineri, saepe podagra diuturna infestato, proficit.

In Anglia aquae Bathoniensis et Harrowga-  
tensis, utpote redditui podagrae prohibendo uti-  
les, multum celebrantur \*.

Omnium

\* Ex earum natura facile intelligitur, quomodo ad  
podagram faciunt. Plerumque in sese continent ferrum  
et gas hepaticum, quae quidem ambo potentissime sti-  
mulant; atque ideo aquae illae eodem, quo res sui  
principia similes, valeant necesse est. Utique immodi-  
cae potae nocent, siquidem corpus plus nimio exagi-  
tent.

Ex D. Lucas et Faulkner experimentis cognitum est,  
aquis Bathoniensibus inesse salem communem, hepar  
sulphuris (seu kali sulphuratum) calcem vivam, ferrum,  
selenitem, atque aëra mephiticum.

Caeterum, quaecunque vis inest illis, eam certe cum  
D. Lucas ex veterum auctoritate aquae simplici tribue-  
re noluerim. Haec quidem ipsa aliquot fortasse in mor-  
bis nihil laedit, in podagra non itidem; quippe quod  
irritabilitas corporis necessario inde periculosius augea-  
tur.

Omnia vero rerum hujusmodi nihil plus, quam exercitatio, juvat. Medicorum unusquisque hanc praecipit atque inculcat; quin etiam D. Sydenham eam podagrico, quamvis inde passuro vel summum dolorem, aut senectute confecto, jubet imperatque.

Equitatio autem praecipue utilis est, quippe quae inertem atque imbecillum stomachum reficit et confirmat, nec non profluvium urinae crassae excitat\*.

His denique servatis, cunctisque excitantibus, quoad ejus fieri poterit, vitatis, nihil fere amplius est, quo morbus repetere prohibeatur.

Jam vero restat aliud nihil, nisi ut paucula super podagrae inordinatae, seu atonicae, curatione accederent.

Ut igitur ante hac omnia in eo erant, quo morbus aliorsum ab extremis transire prohibe-

E

retur,

\* Semper quidem urina crassa, vi accessionis decrefcente, redditur; hinc mutationem in melius, quando-cunque talis exire coeperit, conjicere par est.

retur, sic nunc contra nihil non tentandum est, quo idem loco ex interiore ad exteriorem pellatur, ibique contineri queat.

Inter alia autem debilitatis signa stomachus jam praecipue affici videtur; quapropter eum in primis, itaque totum corpus, corroborari oportet.

Exercitatio, ac nominatim equitatio, imperari debet.

Caro pro lacte atque oleribus, et vinum, modice scilicet, sumi potest. Si quando hoc nimis acescit, spirituosus liquoribus aqua dilutis utendum est.

Amara, cortex Peruvianus, et ferrugo nunc, ut graviora duntaxat leventur, recte dantur; cum eo tamen, ut ratio pristinae vitae habeatur; alioqui enim malum non solum non ad extrema abigitur, nec corpus confirmatur, sed quaedam tenerior pars occupatur, atque infirmitas totius corporis augetur.

Vomitus

Vomitus et dejectio, nausea infestante, profunt. D. Musgrave, qui super hac re fusius differuit, purgationem die secundo post vomitum monet, ratione nimirum virium nunquam non habita.

Denique, si quando ea medicamenta vincuntur, et stomachus usque dolet, cantharides illitae inferioribus extremis interdum auxiliantur.

Morborum quidem nullus D. Hoffman, Musgrave, Cheyne, et Whytt, auctoribus, est neque formidolosior, neque mutabilior podagra, quae, extremis relictis, per corpus vagatur, ac partibus demum infidet, quae minus opportuna esse videantur. Atque ideo naturalia etiam periclitantur; et gonorrhoea, et tumor testium aliquando inde exorta sunt.

Si stomachus praecipue urgetur, ad fortiora vina, atque aromatica, eaque calida, decurrendum est; quin etiam, si res postulaverit, liquores ardentes, iique liberaliter ingerendi sunt.

Allium quoque, assa foetida, atque alkali volatile, aliquid juvant.

“ Verum

“ Verum hoc in casu (ait D. Sydenham)  
 “ modo non caput, at partes vel naturales, vel  
 “ vitales, ejusmodi malum impetat, ad lauda-  
 “ num statim confugiendum; nempe laudani  
 “ liquidi guttae viginti haustulo aquae epide-  
 “ micae immistae propinentur, et in lecto ad  
 “ quietem aeger se componat \*.”

Hujusmodi quidem curationi D. Cheyne non-  
 nihil opponit; veruntamen ex opio-confecta hic  
 non parum valere videntur, atque etiam, expe-  
 rientia suadente, majore pondere nunc imperari  
 debent.

Vomitibus quoque interdum accedit; ideoque  
 invitare eundem, tepida nempe aqua, expediet,  
 ac postea, quo commodior quies veniat, opium  
 ingerere.

Si quando pars vitalis tentata sit, fortasse me-  
 lius erit, morbum, quasi primarium quendam,  
 curare. D. Sydenham, pulmonibus affectis,  
 sanguinem mitti, ac sudores, si diarrhoea male  
 habet, evocari jubet.

Denique,

\* D. Sydenham de Podagra.



Denique, si difficultas spiritus exercet, ex opio confecta, nec non spasmos inhibentia, atque illitae cantharides, optime proficiunt.

Talis videtur esse ordo curationis; simulque inter cuncta contendere quam maxime oportet, ut malum, partibus magis necessariis depulsum, in extremis cohibeatur, id ipsum quod plurimum praesidii praestitutum erit.

Postremo, quod ad podagram attinet, quae vaga seu aberrans specialiter audit, illud tantummodo subicere habeo, quod saepe difficillimum est, satis nominatim decernere, quatenus isti imputanda veniant. Hic certe, si usquam alias, proclivitas et genus vitae aliquid valere videantur; at vero, quanquam cunctis istuc spectantibus, curatio itidem, ut modo dictum est, ad morbum, quasi primarium, dirigatur oportet.

Caeterum nunc fere renes dolent, atque signa nephralgiae calculosae adsunt. Sub quo casu aqua calcarea optime omnium respondet; quin etiam est, ubi, D. Whytt auctore, contra alia insuper auxilietur.

F I N I S.











